

佛说医喻经 1 卷

No. 219

佛说医喻经

西天译经三藏朝奉大夫试光禄卿传法大师赐紫臣施护奉 诏译

如是我闻：

一时世尊在舍卫国中，与苾刍众俱。是时世尊，告诸苾刍言：「汝等当知，如世良医，知病识药，有其四种，若具足者，得名医王。何等为四？一者识知某病，应用某药；二者知病所起，随起用药；三者已生诸病，治令病出；四者断除病源，令后不生；是为四种。

「云何名为识知某病，应用某药？谓先识知如是病相，以如是药，应可治疗，令得安乐。

「云何名为知病所起，随起用药？谓知其病，或从风起、或从癩起、或从痰起、或从癩起、或从骨节起、或积实所起；知如是等病所起处，随用药治，令得安乐。

「云何名为已生诸病，治令病出？谓知其病应从眼出，或于鼻中别别治疗而出，或烟熏水灌鼻而出，或从鼻窍引气而出，或吐泻出，或于徧身攻汗而出，乃至身分上下，随应而出；知如是等病可出处，善用药治，令得安乐。

「云何名为断除病源，令后不生？谓识知病源如是相状，应如是除，当勤勇力现前作事，而善除断，即使其病后永不生，令得安乐。如是等，名为四种知病识药。

「如来。应供。正等正觉，亦复如是，出现世间，宣说四种无上法药。何等为四？谓苦圣谛、集圣谛、灭圣谛、道圣谛。如是四谛，佛如实知，为众生说，而令断除生法。苦本生法断故，而老病死忧悲苦恼，诸苦永灭。如

来。应供。正等正觉为是利故，宣说如是无上法药，令诸众生得离诸苦。诸苾刍，又如转轮圣王，四兵具足，故得如意自在，如来。应供。正等正觉亦复如是。」

佛说此经已，诸苾刍众，欢喜信受。

## 佛说医喻经

---

【经文信息】大正藏第 04 册 No. 0219 医喻经

【版本记录】CBETA 电子佛典 Rev. 1.7 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，释常谛法师提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】

---